

漳州府志卷之二十九

人物二 乾隆志卷三十七

○明列傳上

胡宗華 士蒙 春同 宜衡 舉 應東

胡宗華龍溪人宋員外騰七世孫也隱居武林赤石巖自

號草澗居士潛心理學言行爲鄉邦式洪武三年以明

經薦授郡訓導講經籍闡析微奧誘教諸生以身爲範

卒以子恩贈中書舍人所著有草澗集六卷弟士蒙亦

薦明經授龍溪學諭以清約方正見稱於時長子春同

次子宜衡 萬歷癸丑志云宗華學行爲當時所重閩書志之正德志以其嘗仕元爲古田學諭黜不

漳州府志 卷之二十九 人物二

書或謂古田之薦實未嘗就考古田志無其姓名未可以爲信也

春同宗華之子永樂改元領鄉薦初授義烏教諭義烏久

乏利第春同課甚勤後多得雋陞柳州府教授改吉安

府吉安人稱之曰教授如春同可謂無媿師表矣篤行

好脩至老不倦著有平菴集三卷孫舉

宜衡名耦以字行有學行事繼母以孝聞郡人士受業者

甚衆永樂十七年以賢良薦授中書舍人後與脩成祖

仁宗二廟實錄賜金帛文綺贈父如其官陞大理評事

居官清苦不以家累自隨尋引疾致仕所著有慙菴集

三卷





舉春同之孫景泰丙子舉人授餘姚教諭兩典文衡稱得人擢知永寧縣尚節儉革冗費平冤獄民初有爭訟久之相戒曰無以事擾吾令也歲饑賑活千餘人嘗禱雨輒應民歌之前永寧縣丞夫婦暴死家人將鬻其子以歸舉曰丞子猶吾子也爲具裝送還其家及解官歸四壁蕭然郡守羅公延以教士有所餽遺悉以賑鄉里之貧乏者年七十卒孫應東曲靖府經歷嘗委勘土官安索忠等爭襲及功臣龔世爵田土持廉秉正滇人稱之論曰朱子之學由元入明盛于浙東何王金許四先生傳宋濂溪王義烏皆稟勉齋之教以爲教者也其

漳州府志

卷之二十九

人物二

二

四百二十二

學以講明踐履爲先切問近思爲要閩與甌近觀草澗胡氏之規言矩行以律身稽古正學以迪士何其與四先生之心相默契也布帛之文菽粟之味當洪武立國之初爲閩學開先此其人矣仕雖不甚顯而三世相承舊德弗替猶有桓春卿張伯饒之遺焉

黃嵩熒泮玠

黃嵩字中正龍溪人正統己未以歲貢授廣東都司經歷時廣寇作亂軍務煩興嵩經理有方嘗上三章乞除弊政皆見采行當道交章薦之景泰間擢平樂知府平樂故彘地猺獞叛服不常嵩以德撫綏之彘落宴然屬恭



城徭叛嵩約民爲戰守具賊聞有備乃解去復徧歷諸寨洞勸諭悉降之九載秩滿士民保留復任三年乞致仕民遮道涕泣如失父母卒年八十一子熒

熒字敦實龍溪人成化壬辰進士授玉山知縣邑地衝民疲熒以節愛撫之流移復業擢南京監察御史丁艱服除改北京御史條上利病十餘事上嘉納之出按長蘆釐鹺政宿弊聲赫然也再按雲貴則鎮以簡靜擢四川副使以母老致仕歸里居喪哀毀有羣鳥繞其屋不去晚年足不入府城課子弟讀書而已壽七十四卒弟煥子琳俱歲貢煥布政司理問琳知歸善縣曾孫泮猶子

漳州府志

卷之三十九

人物二

三

三百八十八

玠

泮嘉靖癸丑進士由行人拜監察御史嘗論劾邊吏僨事者置于辟再按西粵值江右多故與大府吳桂芳勘平之未幾出爲太平知府威以惠行奸宄屏跡其風猷克繩祖武云

玠字孝徵嵩之曾孫正德庚午舉人授漢川知縣平巨寇陳大經等民賴以安再知平樂縣旁邑民饑發金助其賑濟全活甚衆遷石屏州知州陞魯府長史匡輔藩王以正陳政要十事立宗約三十六條王敬憚之已而乞歸居家敦倫睦族爲鄉邦所重



論曰黃嵩爲吏著循績熒理繁治簡因地制宜泮威  
惠並施玠以禮匡輔賢王樹德莫如滋若黃氏之累  
世靖共厥位培根及枝宜其保世滋大也

吳原

震泰

夢麒

森

瓌

吳原字道本漳浦人天順八年進士拜兵科給事中首陳  
正心任賢重爵賞節用度斥異端五事上嘉納焉成化  
四年與同官上疏請溥恩惠廣嗣續以語涉宮闈被譴  
十五年進都給事中時初置西廠伺察中外原以非祖  
制請革之安南窺滇女直侵遼原乞罷守臣貪恣誤國  
者又論大臣不當諂附西廠爲所中久之始陞太僕寺

漳州府志

卷之二十九

人物二

四

四百二十六

卿繼擢戶部侍郎總理京儲先是倉場有盜取芻糧者  
事覺吏箠擊之幾死始畀之理原曰律有正條奚箠爲  
盜聞而感之遂不竊親藩軍校橫甚至縛官吏自放支  
祿米原曰此尙知有三尺耶嚴置之法其張弛得宜如  
此宏治五年兩浙大水民饑奉勅兼左僉都御史往視  
之至則宣朝廷德意搜求民隱勸分平糶共聚粟三十  
餘萬石銀七萬餘兩次第發賑又奏蠲累年逋負民賴  
以蘓築海堤塞礦穴嚴生女不舉之禁民德之明年召  
還以疾卒賜鈔給驛還鄉復遣官諭祭董塋事原善記  
憶凡奏牘累萬言默視至再輒能舉其辭公暇手不釋



卷尤精左氏春秋其著述有南行稿浙巡錄奏議共若干卷第震舉人少負志節官至廣東提舉泰成化甲辰進士端謹有文名從兄弟森瓌俱進士子夢麒舉人夢麒字子玉性孝遭母喪在殯劇盜猝至家人爭竄匿夢麒獨身擁衰經哭守柩旁賊見而憐之相勸勿犯孝子家守制三年有白鵲白鸚鵡來巢

森字以時天順丁丑進士初授禮部主事歷浙江叅政廉靖自守而以公勤濟之守紹興郡徭役較丁糧多寡爲輕重貧富適均江山寇負險弄兵幾三年森設法捕之民賴以安在浙十餘年凡所設施皆平恕寬仁之政百

漳州府志

卷之三十九

人物二

五

三百九十四

姓懷之

瓌字仲偉成化五年進士授南京駕部主事進員外郎部檄催督應天等郡賠償種馬瓌奏蠲其不能償者轉庫部郎中擢貴州叅議以平寇功遷雲南叅政奉勅整理鹽法先是撫臣奏稱本省黑白安寧等鹽井私鬻久逋插和灰泥等弊致客商解體瓌至乃懸明禁洗宿弊鹽法復通陞本司右布政使土酋黎姓者弑其叔而奪之位時議欲寬假之瓌執不可竟置之於法以外艱歸卒于家瓌性質儉與鄉人處無異隱約時沒之日遺橐蕭然



論曰吳原任給諫多興德之言其請葺西廡乞罷鎮守中官不避忌諱可云忠矣夢麒寢苦枕塊不避盜盜亦不忍傷之父忠而子能孝可風也森廉靖而濟以公勤瓌處貴無異于隱約兄弟立朝各舉其職如笙瑟相應墳篋交和邦家楨幹萃于一門不亦休乎

張綽綱 廷棟 廷榜 燮

張綽字本寬龍溪人宏治癸丑進士授刑部主事歷郎中明慎敏練丙寅大讞天下刑獄綽奉命恤兩粵使道過家潮州有殺人當死者懷金數百候于道因鄰戚以求免綽叱去捕置之法時海禁嚴聞宗人私造巨舶將越

漳州府志

卷之三十九

人物二

六

四百零五

販命亟焚之無何遘疾卒綽內行惇至恤兄弟之孤如已子與人交憫窮恤急于師友之義尤篤云翁綱字本紀亦篤行從伯喪不能葬與之地從兄歿不能殯賻之財課諸子學曰業欲一思欲深科第有定勿外慕蓋幾于知道曾孫廷棟廷榜

廷棟字國材萬歷庚辰進士授行人後先奉使諸藩贈餉一無所受會道經吳越所知為鹽筴御史有賈人為仇家誣諂其子出白金為壽丐廷棟一言已却之矣然心憐其冤密為白御史出之賈人不知為公力也為行人十載屏跡權門會閩中吏部郎缺當事將用廷棟或告



曰當謝廷棟不往當事啣之置第二後改儀制司主事  
踰月而卒廷棟性度深純飲人以和生平無疾言遽色  
事太夫人至孝有不懌必免冠跪床下母意釋乃止里  
居未嘗造官府請間遇鄉國大利弊輒以義爭如議改  
客兵營于西郊請開城壕疏滯道壅里閭至今稱之

廷榜字登材與兄廷棟齊名萬歷甲戌進士令太平爲民  
講律令設鄉約簡賦役繕頽圯他不屑屑也暇日課諸  
生自作文示之旁邑才名士多挾藝願從使君遊者竟  
以不善事上官調鎮江丞未幾視篆吳江吳江去鎮江  
數百里盜發鎮江界竟以是貶官已復撫他事論罷歸

漳州府志

卷之三十九

人物二

七

四百二十一

築館芝峯鄉後進爭執經稱弟子買一舟入夏乘之聽  
其自浮止里居三十年未嘗干人所著有盥耳吟若干  
卷子燮

燮字紹和幼穎敏絕人父廷榜甚愛之比長博極群書萬  
歷甲午舉于鄉與蔣孟育鄭懷魁等號漳七子文名大  
噪顧紹和性灑落不急宦達歸而侍其父構廬錦江之  
上怡然也天啓間何喬遠疏薦預脩實錄辭不赴諸名  
士多以書勸駕然終莫可奪遠近舉稱曰徵君旣而黨  
禍大作徵君獨飄然幾先衆比之申屠蟠郭林宗云所  
結納遍海內郡中最善黃道周道周所謂雅尙高致博



學多通不如張燮是也有手定漢魏七十二家東西洋  
考閩中記羣玉霏雲二集行于世徵君有子五人于壇  
于壘二人知名于壇字升甫于壘字凱甫俱邑學生于  
壘從道周遊稱爲聖童著有麟角舒節二篇各二十卷  
早卒諸公爲立祠曰幼清

論曰明至孝宗朝含和發英歸于德元上下和同純  
懿貞一觀於張氏奕世濟美可以知之矣緙明慎治  
獄內行惇至三傳而孫曾克紹先業廷棟雪冤不令  
人知廷榜愛士能使諸生日挾冊從使君遊西京循  
吏何以加茲燮美秀變而文勝然爲石齋所傾洽稱  
善夫

### 漳州府志

#### 卷之二十九

人物二

三百九十七

其人在申郭之間則賁極而反本非務華以絕根也

戴昫 時宗 廷槐 燿壘 燿附王一范 燿紆

戴昫字中正長泰人父皞有隱德爲父母度幽宅不能得  
與妻陳氏置兩筐于坐榻行一善投一錢于左有未愜  
意者投于右久之左筐滿而右可傾果得吉卜以勤儉  
訓子孫昫其長子也成化舉于鄉任樂清令破觚爲圓  
政尙長厚嘗築陂灌田萬餘頃民德之性侃直不能曲  
承上官意拂袖歸優游田畝朴素如布衣將遊山寺僧  
聞之掃徑以待昫傲裘羸馬坐寺門啖胡餅僧麾之曰



舍長何爲者戴公將至亟去公莞爾徐行數里僧問知爲公追謝公曰興盡歸來爾何爲其坦易如此子時宗孫淵曾孫廷槐廷采廷朴元孫燿燿燥燥燿燿燿燿雲孫堦族孫紳相繼登明經進士第簪纓之盛無與比時宗廷槐燿燿燥燥有傳

時宗字宗道正德甲戌進士授刑部主事有緹騎殺人尙書欲曲庇之時宗執法不貸調吏部考功主事與同舍郎張衍慶等諫武廟南巡忤旨罰廷跪三日杖三十直聲由是起歷考功文選郎中詹事霍韜薦起給事中陳洸旨下吏部時宗持洸不可用霍不以為怨人兩高之

漳州府志

卷之二十九

人物二

九

四百三十三

旋遷大理寺少卿行人薛侃奏請建親藩入侍上震怒下法司廷鞫之時宗力言侃狂瞽不足深罪事得解所開釋株連者甚多遷都察院右僉都御史巡視河道時宗到濟上凡水患病民處躬行詢覽條上三策行之適邊警詔改提督薊州軍務星馳赴鎮屢奏膚功又奏革黃花鎮鎮守內臣未幾罷歸臺諫薦起巡撫鄖陽時旱蝗相繼俄殍盈野大發穀賑給佐以軍儲增築鄖陽鎮城改置上津縣廟川堡于要害地以平竹溪金川賊賜金幣陞都察院左僉都御史旋被誣回籍杜門不出臺省交章薦之竟不起時宗少負經綸才老而愈練所至



皆有恩于民精聽斷吏不敢欺爲詩興致清遠文亦廓達莊雅成一家言自命朽菴存稿行于世

廷槐字元植自束髮喜博覽羣書而尤邃于理解年十四補諸生督學姜公閱其海潮喘息論嘆曰是足當一部山海經置第一隆慶二年應恩貢入南雍與姑蘓張幼于齊名館下姜大司成嘗曰用賦張也升堂小戴入室矣一時詞人俱爲之傾而廷槐不以自喜嘗與同安林希元蔡烈爲忘年交謂林講究獨精蔡則躬行彌篤游建安晤楊邦彥獲聞克己寡欲慎獨之說益潛心于內爲淳安令以經術節吏治邑瞿然顧化是其效也著有

漳州府志

卷之二十九

人物二

十

四百二十五

易學舉隅孔門源流孝經刊誤注解樵雲叢談製錦堂集若干卷叢談一書于儒先源流派別辨析明白切至可以窺其平生用心之所存矣

耀字德輝一字鳳岐登隆慶戊辰進士起家新建令五遷而至右都御史巡撫粵西正己率屬內安外攘岑溪蠻叛衆云宜撫耀獨排群議出師平之晉少司馬尋改總督兩廣得便宜行事墨吏聞風解印綬去耀以兩粵地遼闊不宜以苛細理獨持大體斥無名之費蠲不急之役俾民力得舒時進諸將指授方畧謹偵伺勤訓練戒生事軍紀肅然遂平府江之徭殲南黎之醜解川湖之



急上嘉其績增秩大司馬督粵十有三載兩推京卿俱不報累疏乞休亦不允上意以朝中幸無事交南天未畔服叵測非藉有威德重臣無以鎮之知遇之深衆莫敢比會有中使採珠粵東爲民患極疏陳不便人爲之愬疏竟留中燿在外任久清正自持多不得要人歡適交趾莫會同楊扶安等作亂燿畫策勿用師惟檄都統黎惟新勒兵討之兵未交要人嗾言者劾失計遂坐解職旣而賊竟就擒如燿策熹宗御極錄舊勲復原職又以子壩戶部秩滿覃恩進階資德大夫燿貌魁偉美髭髯性質宏毅而慈祥恪謹在制府十三年未嘗輕戮一

漳州府志

卷之三九

人物二

七

四百二十六字

人里居值萬壽節必肅衣冠望闕稽首邑獄有重囚潛結客兵爲內應夜率其黨越徃出加刃于令衆惶遽不知所爲燿聞變負劔入縣戒民無動急遍塞市中柵屹坐縣門賊望見驚曰戴公在此矣斬關遁指揮吏卒盡擒之老壽而康及見後戊辰登第者尤爲漳人士所罕有云子壩由進士兩任司李寬嚴得宜陟戶部出權淮關徵稅不苛商人德之

燿字亨融幼聰穎稍長好古文詞工吟咏與計部王一范孝廉王協夢王從鵬洎從弟方伯燿讀書東山號五友萬歷壬午舉鄉科丙戌成進士選授行人用封益藩益



於諸王屬最貴禮賢下士燦至倡和甚歡而獨不能飲  
王靳之曰先生腹滿書籍安能酒也旋陞南御史巡上  
江并理漕務小心整飭改交州僉臬尋轉黔藩督學政  
燦素喜言文至是進諸生討論文體一歸於正所拔取  
皆知名士相繼登顯列又疏請廣邊徼弟子員額以鼓  
動之燦歷官孤立無附失權貴意改松潘叅議松潘古  
氏羌地土酋負險屢猖獗燦下車躬歷諸要害繕甲兵  
修城堡嚴斥堠以恩信結之夷類欵服遷憲副移鎮成  
都松潘民惜其去遮留之不能得適蜀有奢酋之變糾  
衆驀入渝州殺督臣直犯四川城燦時方苦病在城中

### 漳州府志

### 卷之二十九

人物二

七

四百三十一字

急飛檄調松潘兵八援竟賴其力城被圍月餘燦寢食  
不離城樓中擐甲枕戈撫勞士卒守禦不懈賊解圍去  
論功陞西川按察使卒於官特贈奉常蔭一子八監著  
有詩文集行世王一范字綏甫起家進士歷官清勤自  
矢執一節不變在五友中以潔白著聲

燦字亨晦生而隆準河目方顙修頂舉止異常兒父龍田  
自幼課以四子書六經外旁及蒙莊韓蘓諸大家文靡  
不淹洽年十八補諸生遭父喪事母沈太淑人以孝稱  
五挫鄉闈益自勵萬歷丁酉登鄉薦又以母訃不上公  
車丁未成進士初授大理評事有冤獄積年不決据理



剖釋廷論稱平歷曹郎出守端州筐篚不入求包孝肅  
公遺蹟而新其祠宇輯其奏議若干卷授之梓曰吾師  
也秋粵西山水漲直趨端州橫衝居民蕩析民泅水走  
時制府以兩粵方多亂叵測戒無動燔力請援乃躬自  
登城編木爲筏下合活一人者賚一金又焚香籲天向  
水肅拜水遂巡退遂行視被淹室廬賑匱乏招流徙埋  
浮殍民皆曰孝肅復生耶釀金鑄像於包祠之後奏最  
遷瓊州兵備兼督學政有獲越販巨艘以報者貨值巨  
萬燔悉靡去之吏白于法當沒官還之非便燔曰朝廷  
方苦乏餉何不以此佐之盡籍其數上之臺一毫無所

漳州府志

卷之二十九

人物二

三

四百三十八字

取尋轉嶺西大叅晉憲長移節汴梁郡各立藩邸宗室  
子弟多違制聞燔至皆欽戢又攝撫篆時青齊白蓮賊  
震鄰封羽書旁午燔措置有方賊不敢入境庫有餘羨  
數千緡吏以例請燔曰吾自有例卽名郡縣屬官來某  
所城垣圯某所武城廟頽吾有羨數千爲繕之郡人立  
石以誌隨陟粵右轄值歲饑民變燔捐私橐倡發富人  
粟賑之乃定時同官相繼罷去燔獨縮四篆力瘁致疾  
請告者三臺使者慰留不許竟卒粵人立祠祀之燔寬  
仁端慎歷官皆有聲績好獎掖後進龍溪魏太史呈潤  
爲諸生時以文贄燔一見許以大器太史感其知己及



發引適在家助執紼行心喪禮族弟紳崇正戊辰進士  
其闡文爲名輩所賞釋褐後念母年高請假歸養母卒  
哀毀竟不起人咸惜之

論曰若游大川先泝其源戴氏至時宗始大顯于時  
良由乃祖皞菴孝親愛弟敦善不怠垂裕後昆子的  
能繩父志起家縣令忠信子惠夫火宿而愈旺木培  
而愈榮於是廷槐經華藻耀聲實懋美耀燦熿諸賢  
同時登朝方州雄藩名都重鎮交羅棨戟對秉旌鉞  
各展碩抱爲國屏翰不顯亦世可謂盛矣或以皞素  
精形家書歸功于地靈夫惟岳降神載于雅詩非誕  
謾也然生甫及申將以錫福斯民豈但一家之慶譽  
而已乎舍德而論藝夫本而求末是顛蒙之論也

漳州府志

卷之二十九

人物二

四

三百八十八字

林功懋 士宏 一陽 一新 楚 士章 汝詔

策

林功懋字以謙漳浦人登嘉靖壬辰進士授東莞縣才識  
明敏遇事決斷嘗委權番舶峻却私賂有巨寇許桂旣  
降而悍恣功懋稔其必不悛斃之于獄陞南京戶部郎  
擢知贛州府時巡撫朱公統揅法嚴切懋濟之以寬張  
弛得宜遷四川按察司副使備兵松潘有邊將何卿恃  
功驕橫懋以法繩之不能堪遂致蜚語告歸家居十餘



年隆慶改元起補山東副使尋陞河南叅政轉廣西按察使未行卒于官功懋爲人瑰岸廓達有大節每慷慨論大事歷如指掌好善樂義鄉人稱爲長者子士宏

士宏字仁甫幼甘淡泊不爲貴介容長而修誠敬踐履之學嗜義慕古爲德于鄉領嘉靖乙卯鄉薦躑躅公車者二十餘年肄業成均大司成王荆石深以國器奇之萬歷庚辰成進士官行人奉使楚蜀二藩左規右矩以德望推重遷比部郎獨存平恕欽卹畿輔多所全活擢守奉天府力疏乞歸飄然風塵之外世莫測其旨也生平守禮教睦宗黨執父母喪三年不入私室分箸庶弟任

### 漳州府志

### 卷之二五

人物二

五

四百三十二

意所欲無靳也撫孤甥如己出厚執友若師父歲稔捐穀賑濟澤及萬家卒之日士民爲之哀泣

一陽字復夫功懋從昆弟也嘉靖甲午鄉薦性坦夷少思寡欲爲學以居敬窮理爲宗謂道至程朱有何不盡何須別立教門判濟南草糧例歲以萬計年饑賑濟得法全活數千人以漕運後期調霍邱令均庸調嚴保甲申禮教民俗丕變時操江都御史洪公朝選督學御史耿公定向深相器重然竟以不諧於時遷藩僚以去歸家談道自樂於聖賢之學日有孳孳接客退休據案默坐家人竊視之端拱如對嚴賓嘗曰惟敬可以勝怠惟勤



可以補拙惟耿可以助廉蓋其生平得力處也善大書  
適勁壯偉後儉定向巡撫閩中下車亟問舊霍邱令安  
在而一陽卒矣乃檄有司祀於鄉所著有論學口議及  
詩文若干卷藏於家第一新嘉靖丁未進士官刑曹執  
法不苛陞雲南僉事性至孝丁艱哀毀以卒

楚字德春一陽猶子弱冠始就學研究濂洛諸書最後得  
傳習錄讀之曰此斬關出圍學問也聞薛中離侃講姚  
江之學於潮州徒步從之講求井田之制寢食爲廢作  
井田私議嘉靖戊午登順天鄉試署學溧陽陞咸寧令  
以禮教革舊俗判廣德州改判雷州雷有珠池楚一無

漳州府志

卷之二

人物二

六

四百二十九

所取念母老投牒歸嘗誦洪範思曰睿睿作聖渙然悟  
聖功易簡之妙於先儒尊程伊川所拂意事輒思伊川  
處此何如以性善爲宗旨於各一其性中悟率性之學  
順性之治其要歸於和順道德使人物各得其所年八  
十卒著有衍書旨摘性對輯思經原儒釋元谷子解老  
諸篇從弟士章

士章字德斐嘉靖己未進士延試第三人爲人凝遠坦夷  
温恭下士進講經筵多所獻納纂脩國史以綜核聞爲  
兩京祭酒士習丕變遷禮部侍郎時江陵柄政附之者  
如蛾赴燭獨士章無私謁時節不致慙慙固已啣之而



事下禮曹多堅持不可江陵大恚嗾所厚科臣論列之  
太學生羣起噪於言者之門欲唾其面科臣羞沮不敢  
出既而有旨勉留尋陞南京禮部尚書三上書乞歸卜  
居于郡北之長橋棲遲二十載卒年七十有七賜祭葬  
子汝詔萬歷丙戌進士亦以宦績著

策字直夫功懋族弟嘉靖戊戌進士授蕭山知縣有聞家  
堰北捍浙江內引湖水爲田數萬頃舊築以土輒壞策  
至悉易以石立蓄洩法爲蕭山人永利政暇則進諸生  
講道術課文藝陞大理右評事轉寺正遷江西僉事丁  
父憂歸卒于家

漳州府志

卷之二十九

人物二

七

三百七十

論曰林功懋當官寬猛相濟于從政乎何有士宏脩  
誠敬之學一陽一新確守程朱不別立門戶從子楚  
議論顧時出入于姚江信乎道術之多岐也士章明  
習典禮遂長春官策有功于民林氏之宗彌大宜矣  
哉

王瓊 惟恕 楊泰 瑩鍾

鴻綸 叶瑤

鍾英 夢枝

王瓊字瑩之自幼甘貧力學嘉靖戊子舉于鄉判辰州署  
府事朝議分封宗藩力陳其非便事獲已辰人立石頌  
德以伉直調雷州築海岸捍民良田萬頃歷知全州遷



金華郡丞皆有善政子惟恕

惟恕字行甫由舉人登嘉靖丁未進士爲刑部郎明讞決嘗署廣西左布政却羨金千餘亦以伉直調歸卒于途至鬻衣釵爲殯具惟恕性端謹人稱其持身如處子處官事如家事事父母如奉嚴君對妻孥如肅賓客云

楊泰字尙夫長泰人事父母能得其懽家貧授徒所得贄修亟以奉其父松菴松菴好施有薄儲卽以饋三黨之貧者不復問所入泰亦忻然贄之不敢問所出也泰嘗行于道得遺金七十餘尾其人乃族兄甫中也盡歸之博覽諸家書而衷諸理不爲泛濫之學由廩貢生舉京

漳州府志

卷之二十九

人物二

六

四百十九

兆越三年二子瑩鍾鼎鍾同登鄉科瑩鍾成進士

瑩鍾字亮閔由進士授戶部主事出權九江稅不取額外一錢時有浦水沉香之目移守處州值歲大饑不及申請飭屬邑開倉平糶仍捐俸以粥饑者全活甚衆病民俗溺女脩育嬰堂以養之并訂婚姻古儀法毋奢濫俗爲之一變晉嶺東道築堤設堡以興水利防海寇民賴以安遂擢粵西布政使革徵解陋規以萬計當是時魏璫義子崔呈秀勢薰灼乃其父泰同年募瑩鍾才名欲羅致之使人導意往見要津可得瑩鍾遽告病歸父少時讀書天成山邑佳處也瑩鍾仍築室居焉足跡不入



城市魏崔敗士大夫多波累瑩鍾獨超然事外子鴻綸  
天啟辛酉舉人知事不可爲侍父山中杜門不出邑中  
鉅人名宿惟戴總制燿以隆慶戊辰登第至崇正戊辰  
年卒壽八十有六瑩鍾以萬歷甲辰登第至順治癸巳  
年卒壽八十有七俱稱純嘏云同時族人鍾英叶瑤俱  
稱亢宗叶瑤著秋兩堂集雅擅騷聲鍾英有傳

鍾英字初暘萬歷辛丑進士授戶部主事陞工曹員外郎  
外轉衡州牧繼補寧波郡守其俗以女許人旣而悔之  
改字不爲怪下車牒訴紛紜鍾英援禮據律判歸初婚  
皆翁服有窮不能婚娶者捐俸助之俗遂變建育嬰堂

漳州府志

卷之二九

人物二

九

四百一十四

置義田按月課試諸生衆戴之稱爲楊父巡按御史最  
其政當內遷父老走相告曰大吏奪我民良二千石乎  
咸匍匐乞再任有詔陞寧紹道駐寧波從民望也寧波  
濱海故有驗船規例歲可得鎰萬有奇悉除去秩滿卒  
於官民立祠祀之順治辛丑子夢枝登進士道經寧波  
故老走迎羅拜曰噫是吾楊父之子也

論曰觀于王氏楊氏之當官牧民猶見兩漢吏績焉  
夫何泰邑之多君子也天成奇絕著圖經然泰邑多  
名山如吳峯天柱其高凌大虛秀奪萬象篤生賢良  
爲邦家光有自來矣



蔡大壯 宗禹 一橙 一彬 而嬾

蔡大壯字丕禮漳浦人性友愛篤志勵學受業于周翠渠之門告以主敬工夫充然有得由嘉靖乙酉舉人授寧鄉知縣開渠灌田履畝均輸撤淫祠禁溺女又重刻翠渠教民雜錄等書授鄉老以教子弟凡折獄必引經文爲斷嘗書居敬二字於衙齋以自勗民有以事至者問曰讀書乎或以貧辭輒勉之時散步郊原慰勞農桑民歡愛焉以入覲乞歸省其俸餘悉以分諸兄弟及族中之貧乏者所著有詩經釋義子宗禹

宗禹字寶元秉性剛介明敏過人萬歷間貢入太學大司  
漳州府志

卷之三九

人物二

三

四百三十一

成業向高稱爲天下士于是聲名藉甚登萬歷辛丑進士司李鎮江下車首嚴左道之禁僧寮道宇置役守之絕士女往來法嚴令肅人莫敢犯惟罪跡未著情屬可矜者多平反郡丞某墨而殘欲以其私害人宗禹力爭之失丞歡又丞方攝郡上官使禹代之丞益恨構陷之遂被劾謫湖州照磨未幾丞亦敗禹乃得白補授麗水令清介自矢園有椿樹菹之以佐食蒼頭短衣不完所得俸錢悉以興學校改淫祠爲書院日與諸生講學其中陞刑部主事以疾辭歸講學于西湖書院以力行爲宗家中一遵古禮居喪不作佛事傳爲家法著有史記



一家言及杜詩句釋行世子一橙

一橙字廷黃充養和粹雅志經學黎明必起危坐曰此平日清明之氣也孟子所謂好惡與人相近者正在此時其焉可錯過或告以姚江良知之說則曰世守程朱門戶未便操戈入室也領萬歷丙午鄉薦每公車北上載籍千卷以行其於濂洛關閩之書雖驢背板橋未嘗釋手曰吾敬此如神明庶幾不見不聞中不敢自肆也著四書提旨詩經會解布衣心圖註與晉江蘓紫溪友善書問辨復甚多子孫各守家學

一彬乃一橙族弟生而膂力過人慷慨尚義有烈士風萬  
漳州府志

卷之二十九

人物二

三

四百二十七

歷間以叅將守仙霞關時山寇竊發多方綏撫民稍安未幾寇猝至以卒少力戰死之  
而燿一橙族子初授銅山把總抵任值海賊劉香糾衆數百突至而燿奮勇與戰歿于陳

論曰古人明經皆有家法如西漢韋氏祖孫劉氏父子遞相授受先聖先師之業賴以不墜抑且煥然大明于世閩中建陽蔡氏自牧堂潛心大業厥後西山九峰繼之縣縣延延經曰文不在茲不其然歟漳浦之蔡自蒙齋先生以經義倡導海濱歷宋元入明而大壯祖孫父子遙遙厥緒三世是承俱以儒術著顯



何其源遠而流彌長也允文允武化及族子輩知戰陣無勇爲非孝三復國殤之篇輒爲嘆息

王會 志達 志遠 志道

王會字延亨漳浦人嘉靖甲午舉人由太湖教諭陞國子監學錄以師範稱擢知道州招撫叛徭適兩廣有大征討兵使者邏得避兵者八十一人曰盜也下州訊會察其寃上牘言諸人皆挾斧鋸入山鬻技者不爲盜使者怒繫胥役刑劫之會不爲動八十一人者竟得釋時急捕逸賊龔廷虎等兵使者授意令斬降徭鄭虎僑等五人頭以當廷虎不者且得罪會謝曰吾不能殺降人爲

### 漳州府志

#### 卷之二十九

人物二

三

四百零八

盜具牒求去遷曲靖府同知攝府事率屬嚴正勘黔國夫人奏沐朝弼謀奪公爵事責朝弼不宜事嫂少恩而治其細人離閒者勲爵竟定時征土酋那鑑布政徐樾隕于軍會爲收散卒護輜重以歸人服其才攝守入覲事竣以親老乞休林居屏跡公門著述自娛有北雍春陵滇中歸田集建文野史湯齋筆談若干卷孫志達萬曆庚子舉人岷縣知縣出郊視民疾苦藹若家人著惠聲志遠志道有傳

志遠字而近萬曆己丑成進士出守澧州左遷紹興府倅轉知晉州陞戶部員外歷郎中以守正不阿九載不徒



官改南禮部郎中歷陞湖南叅政分守長沙寶慶時宗  
祿南兪等弊病民志遠窮究搜剔禁之又設法捕岷府  
用事人匿王宮者械戍之髡其兩校尉王震悚楚人大  
快陞本省按察使旋擢四川右布政蠲鹽稅三萬九千  
以不滿中丞意爲所劾遷江西左布政拂衣歸三年乃  
調河南右布政會遼師潰朝議四省募兵志遠愀然以  
爲非計委曲調劑以舒民困比兵至京師軍容壯于他  
省光宗卽位遷廣西左布政議罷閩廣佐運海船令出  
船價移近地脩造而遼報復至日夜調兵餉竟以勞卒  
于官志遠性恬淡不營財利歷官數十年常布衣家無

## 漳州府志

### 卷之二十九

人物二

三

四百二十九

私積卒之後第志道列宦績上于朝得贈太常寺卿

志道字而宏號東里萬歷四十一年進士除丹陽知縣天  
啓改元擢禮科給事中二年改兵科疏陳時弊言今日  
中旨屢宣群臣輒疑非上意票擬已下閣臣外間相傳  
爲內批疏已發抄而未見題覆覆已闕歲而未見施行  
欲省議論而議論反多欲辨人才而人才愈混臣以爲  
今日惟復祖宗舊制爲先娓娓數千言指陳切當時三  
案之議方熾志道雅不欲附和疏請終養歸明年冬魏  
忠賢盡逐高攀龍等朝事大變召還志道擢太常寺少  
卿以外艱不至服闋陞通政使司右通政尋轉左皆不



赴凡三晉秩俱未嘗一履任崇正元年以原任左通政  
召用赴闕朝議陞職不赴宜以原官用遂移疾值京察  
自陳不職求罷有旨回籍調理明年夏召爲大理右少  
卿再遷左副都御史脩撰陳于泰疏陳時弊侵及內臣  
宜府監視中官王坤力詆之志道上言陛下之遣內臣  
不過覈錢穀兵馬而已非假以官評吏議也邇年以來  
肆行彈劾南衙北司兩相構鬪固廷臣之患亦非內臣  
之利也帝怒責回奏志道反覆奏辨云治兵惟在擇將  
若使內臣監督則魚朝恩出卽李郭不能成功帝益怒  
御文華殿召對竟削籍歸志道自癸亥乞終養至是凡

漳州府志

卷之二十九

人物二

十四

四百十三

九載家居在朝僅兩載耳丙戌四月卒於家年七十三  
論曰王會不肯殺降以忤當道其子志遠蠲苛稅爲  
大府所劾可謂明于輕重去就之分者矣志道論治  
兵惟在擇將魚朝恩出卽李郭不能成功使當宁能  
用其言明事猶可爲也書云有猷有爲有守若王氏  
祖孫庶幾焉或疑魏璫逐高攀龍召還志道近於易  
之若濡有愠者始也以外艱不赴服闋矣仍不赴浮  
游塵埃之外泥而不滓孰得而議之

李世浩

文察

文餘

李世浩字碩遠號愧菴蚤年及蔡虛齋先生門聞其講易



輒歎曰古之人古之人嘗得吉壤推與宗人共之競荷  
土輦石甃城堡聚而家焉作祖祠聯大小宗修合食禮  
嘉靖初以選貢司教南海與諸生講論王陽明湛甘泉  
合一之學而于魏莊渠之書尤致意焉陞教授致仕歸  
荆西山李氏家規建聚賢堂設義倉鄉俗有殺身以誣  
人者世浩愀然曰吾里之辱也里人有不善惟恐爲所  
短以長子文察封太常寺典簿次子文餘贈應天府通  
判孫時能時宗俱崇正壬午舉人

文察字廷謨貢入太學得樂書歸能審聲候氣洞曉音律  
著樂記解補說律呂註及典樂論等書倅遼州時奏進

### 漳州府志

### 卷之二十九

人物二

三五

四百零七字

郊廟大禮有詔召入京官太常凡有祀事令扈從秩滿  
遷磁州守丁內艱歸再補晉州

文餘字廷積嘉靖乙丑進士爲蕭山令政治清平復尹頴  
上擢應天府判剔織造宿弊以憂歸再補順天府判出  
知陳州值汴省大饑便宜賑濟全活數萬人陞南京工  
部主事督脩元武門節省原直數千掛冠歸杜門不出  
所居僅蔽風雨晏如也

論曰正德嘉靖之交陽明甘泉莊渠各倡明斯道而  
莊渠切實與虛齋論學宗旨相近世浩早年學易于  
虛齋能心知而好之其見卓矣文察精于律呂不屑



屑章句學文餘掛冠不戚戚于貧窶觀二子之志尙得之庭訓爲多故表而出之爲承學者正其趨向焉

周一陽 起元

周一陽字養初海澄人篤志好學以名節自許廩于郡庠督學姜公重其學行檄召爲五經書院長隆慶中新設海澄縣督學蔡公語郡守曰邑新造宜得端士以風勵學者檄學官移一陽充海澄廩生其年遂應貢授南城訓導遷惠安教諭再遷儋州學正幡然曰九載寒氊備知宦况吾道自足何事間關航海爲五斗計遂投檄其訓南城以身爲教盱士至今尸祝之家居恬淡敦尚風

漳州府志

卷之二十九

人物二

三

四百零十字

節二子婦俱孀守長孫女亦死于節孫起元應天巡撫死於璫者也人謂一陽一門文章節義師範家政無慚名德年七十九卒

起元字仲先號綿貞萬歷庚子解元明年成進士初令浮梁有大姓欲吞范文正雙溪書院起元持法不阿士論重之調繁南昌凡盜發他境匿宇下者悉捕得壬子授湖廣道御史奉勅巡漕振滯疏壅公私便焉時臺臣有上疏攻東林者起元抗疏言東林之學起于楊時今議者欲借道學以攻楊時借楊時以攻羅汝芳顧憲成皆非是劾去朝貴數人而方從哲以中旨起少宰不由廷



推又疏駁之左遷出叅粵西值柳慶大饑盜賊逢起起元立馮運法多方處置民以無殍而盜悉平擢四川觀察未任備兵通州紀律大肅客兵逼懾不敢譁晉太僕卿時鄒南臯立首善書院兵科朱童蒙詆爲僞學起元抗疏辨之明年授僉都御史出撫江南初爲御史時稅璫高竈在閩橫征海舶洋貨脅官吏燒殺市民莫敢言起元特疏叅之中璫久已側目至是吳中織造太監李實以郡丞楊姜不行屬禮誣以罪起元三疏救之實假上供爲名逆取舊額外多至十餘萬又密偵殷富月報爲匠籍吳中大擾起元屢疏叅劾前後所上轉加切至

漳州府志

卷之二十九

人物二

七

四百三十七

而內監魏忠賢以天下官吏方承順意旨稱功德趨附恐後起元獨每與其黨類齟齬阻其威思有以殺之會朱童蒙由科臣外轉爲兵備多內援驕橫斃漕卒非法吳民閔聚生變起元勃然曰天子命我撫民察吏可坐視此等虐吾民耶疏上中旨擢蒙太常削起元職歸里周順昌贈以序曰公去名益高矣吳人無老少皆隨送涕哭聲塞市童蒙已竄身璫黨起元歸羣克意猶未厭嗾科臣李魯生劾起元借講學爲名與高攀龍周順昌等朋比刺譏濁亂朝政取李實空印本至京令李永貞具草誣起元阻抑上供冒破鼓鑄逆璫遂矯旨與高周



七人同逮緹使至漳漳士民大驚呼設木櫃於郡四門  
投錢不數日錢滿復擁諸緹使相率泣言周中丞寃且  
貧緹使亦心服加慰護至都下獄拷掠備至致贓十萬  
獄中遺家人書曰吾仕宦二十餘年只有山田數十畝  
可供祭祀所購吳中卷籍頗多可檢賣爲餬口費也遂  
與高攀龍周順昌宗建李應昇黃尊素繆昌期先後俱  
死于獄所謂後七君子者是也崇正元年贈兵部侍郎  
諡忠愍特祀于郡學之西春秋致祭又允御史袁鯨請  
與前楊左六君子同建祠京師而吳之閭門及清涼山  
江之右粵之西浙之西湖亦各有祠

漳州府志

卷之三十九

人物二

三

四百〇五

前志論曰漳郡當明季周起元黃道周皆以死著也  
道周批逆彈奸盡瘁捐軀自尋一死固其所也起元  
之死可哀哉劾璫糾朱爲民請命乃與楊左高魏十  
三君子後先死于獄有明二百餘年元氣至是盡矣  
起元之學不欺爲本以穉圭君實自命歷官所至皆  
有政聲撫吳時江南大水六疏賑災免漕吳人至  
今思之嗚呼又何其經濟名臣也

照二希堂  
集原本

鄭鼎 崑貞

鄭鼎字爾調龍溪人舉萬歷癸卯鄉試六詣公車僂售矣  
竟列乙榜選授南安教諭居五載人文蔚起遷貴陽廣



順州守廣順故土司地入版圖未久背山襟壑僅如一村落人家城市倉獄槩未建置諸苗輒耽耽其側鼎至則募壯士若干人申明賞格一日擒二會長至怖伏詢知盜患起於徭役太繁釋弗誅與定約而遣之盜喜果以羣酋至自占見戶爲核實許蠲其半咸叩頭謝去威信旣行方次第議築州城會蜀奢酋變作水西蠢動鼎曰事急矣卽城未易議吾姑刻大木樹柵內壅之土猶可憑爲守禦計先是安邦彥蓄逆謀久鼎嘗道遇之與語心動亟入白藩司陳必反狀爲條畫三策廣積貯防要害連絡土司法甚具藩司懦拂若罔聞至是邦彥遂

漳州府志

卷之三十九

人物二

五

四百三十三

以二萬騎攻廣順廣順金土官幼未能視事民爭走依鼎衙署皆滿鼎揮戈躍馬大呼汝曹姑自爲計吾守土吏事急盡一死報國耳衆泣莫肯去初共憑柵鬪殊力賊未敢逼會日暮火聲四起柵毀賊鼓譟入鼎知事不可爲投簿書寇服火中趣埋卹嫚罵賊死之僕從殉者六人鼎少孤事母孝友于兄弟工文飭行恒斤斤辭受取與間移孝作忠非徒取感憤自奮力屈智窮空一死抵責已也訃聞詔贈光祿寺卿予祭葬建洞立坊蔭一子錦衣衛正千戶世襲殉死僕六人亦從優卹子崑貞

採墓志



崑貞字十師父鼎死廣順州之難崑貞三往迓卒負骸歸  
天啓丁卯舉于鄉崇正元年上書陳父死節請贈廕子  
諡其略云臣飲血星奔赴臣父之難而重圍終年方解  
長途更歲始通一望平原蔓草縈骨二三遺老指翠然  
者泣示臣曰此吾邦君之穴也臣對穴暈倒久而復甦  
及詢六僕不知肝塗何地臣又不勝泣然仆也院司給  
含襚歸伏祈聖慈照死節例一體表揚并優卹親僕以  
慰忠魂於地下詔從之甲戌成進士授行人轉山西道  
御史出按應天捐俸治黃山采石孔道行旅便之號鄒  
公堤值左良玉爲闖賊所迫徙師而南去蕪湖二十里

漳州府志

卷之三十九

人物二

三

四百五

遠近震恐崑貞移書云陪京乃高皇帝陵寢重地將軍  
一望石頭城當必灑太貞之熱血飛處仲之遊魂復親  
詣其營責以大義良玉惶愧解去鳳陽總督馬士英誣  
奏歛翰林金聲紘叛卒殺官兵禍且不測爲直其寃坐  
是與士英忤解職歸從黃道周講學鄴山順治丁酉年

卒

採縣志

論曰王安石作丁元珍墓銘謂歐未嘗教之兵臨不  
可守之城以戰虎狼百倍之賊議今之法則獨可守  
死耳論古之道則有不去以死有去之以生者安石  
可謂知權矣若繩以臣子守官之大經如鄒鼎之臣



死忠僕死義其正也崑貞問闕白折冒白刃歸父骨  
伏闕以揚父之忠而已亦以孝顯讀其疏可泣鬼神  
也況於人乎以左良王之跋扈崑貞一書而退其數  
十萬之師固其詞之善亦平生忠義之氣有以奪之  
也歟

張若化 若仲 士楷

張若化字兩玉號蒼巒世居浦之丹山弱冠師事黃道周  
得聞明誠之學旁及律歷經綸諸務靡不淹貫崇正丙  
子舉于鄉兩上公車不第而弟若仲以庚辰成進士因  
畱京師時道周以言事下北寺獄若化青衣小帽雜廝

漳州府志

卷之二十九

人物二

三

四百

役中時時進獄問起居左右之燕都陷唐王入閩徵拜  
御史數月乞歸事父母志養食貧茹苦嘗搗栢葉以代  
園蔬諸孫嘗之喀喀不下咽若化茹而甘焉山居四十  
年足不及城市未嘗以姓名通有司勵志獨行不標講  
學之名疾惡守義凜不可犯雖骨肉至親不少假而鄉  
里有冤無告者多方營拯之迨網解其人勿知也時值  
兵荒盜賊蜂起群相戒曰慎勿犯張公廬鄉人依以避  
難終其身盜不入境丹山在羣山中巉巖阻絕日夕雲  
霧往來茅茨數椽上漏下濕豺虎交橫時曳杖孤往登  
陟羣峭徜徉泉石嘯歌自得人咸異之年六十六正襟



危坐無疾而終子士楷能繼父學

張若仲字聲玉號蒼巒生而韶秀讀書明理以不欺方寸  
爲本嘖笑不苟作止語默持之以敬若性成焉崇正丙  
子與兄若化同舉於鄉庚辰成進士例選州牧性廉靜  
不願任煩劇改授益府長史居官清儉簡貴以禮匡宗  
藩請崇寬大戒嚴切不納以去就爭之益藩爲之改容  
以母病乞休歸母歿旣葬爲土室處其傍聞狐兔嗥嘯  
輒泣下嗚嗚鼎革後山居五十年清修獨善藝圃一區  
菓蔬薯蕷度給賓祭餘悉種梅竹栽蒔灌溉身自爲之  
時簞筩牽犢飯隴畝與野夫雜處邑鎮帥某雅慕其爲

漳州府志

卷之二十九

人物二

三

四百六

人願一望見顏色固拒之兄若化語若仲老父在堂須  
爲門戶計懼且齟齬我不獲已野服徒步從一奚奴往  
來通刺出具賓主徑去帥武人不知書然顧愈重之晚  
歲益務爲敦篤飲人以和遇鄉里有爭訟輒勸息不聽  
者強揖之聽者亦揖致謝邑濱海有蝗起群飛蔽天觸  
禾稼草木葉噉盡民多聚泣或泥首禳之獨若仲所居  
數里內外無蝗患里賴以安時康熙二十九年也歲丁  
卯秋夜風大作所居屋盡拔若仲獨寢地上無恙黎明  
人視之毛髮爲悚年八十四以壽終鄉人稱若仲兄弟  
爲丹山先生而不名與兄若化同祀鄉賢



士楷字端卿幼穎異稍就外傳卽學爲詩歌古文詞超然獨往下筆立就會臬章父與季父偕隱丹山士楷方弱冠思承歡膝下克世忠孝以養親志乃一意屏棄舉子業潛心性命之學以主敬爲根本嘗謂精一之傳九思盡之作九思注錄太極圖說定性書西銘敬齋箴各爲題詞參曲禮內則小學諸書爲敬學科條務合天則而不苦於拘攣以授學者爲言行準漳南學者爭師之願亦畱心時事見海波騰沸梓里流亡輾轉輒形諸詠歎其論經濟之本必在存養之熟從性命中起經濟還從經濟中求性命斯內聖外王之學也平生踐履端重溫

漳州府志

卷之二十九

人物二

三

四百三

克望之如泥塑接之和氣藹然而義之所在剛介不撓雖妻孥不以情恕千駟萬鍾不以易也嘗託買卜遊郡市中意有所觸亟還山遂杜門不出晚歲不屑屑文藝然文益深造詩直逼少陵凡天文地理輿歷象律呂無不洞覽卒年四十有七論者以士楷方漢汝南黃憲憲好臧否人物時露圭角中涵養所得未知於楷何如也所著有濮沿山人集談學錄明儒林列傳土室庸言藝苑提宗靜學編等書

前志論曰二張當易代之時年未強仕蔬食敝廬以終其身志亦苦矣家門穆穆兄弟相師疾惡守義纖



微不苟至於盜不入鄉墮不犯境純孝孤忠天人鑑之黃石齋以忠烈顯天下二學苦節清操步其後塵論者方之古夷齊夫豈過哉士楷善承親意彌遠家學澄之不清滄之不濁擬之叔度庶乎近之矣

謝璉 潘榮 周宜

謝璉字重器龍溪人宣德丁未廷試第三人除翰林院編修嘗從謁長陵獻陵述稼穡閭閻利弊甚悉丁艱服除與修宣宗實錄及令典聖鑒日歷諸書因災異陳言請出宮人又請赦諸無辜及除連坐法尋遷侍講正統十四年上言時政十五事

一曰修陵寢以敦孝道二曰練將兵以修武備三日壯閑隘以

漳州府志

卷之二十九

人物二

三

四百全

防不虞四曰謹災異以回天戒五曰恤饑寒以周編戶六曰峻內治以杜外患七曰優元老以專責望八曰近儒臣以充德業九曰興勸農以足衣食十曰擇巡撫以慎風憲十一曰嚴薦舉以息奔競十二曰尚廉耻以敦士習十三曰周窮乏以行仁政

又言石亨不可專任尚書于謙知軍

旅老臣胡濙堪付托事後若懸鑑而築城龍巖備守禦亦璉所議也秩滿陞南京戶部右侍郎創便宜六事為經久可行之規明年兼掌兵部務時戶部郎陳秀坐誣下獄璉力爭之秀乃得釋景泰癸酉以疾卒于官詔遣中使蒞喪諭葬祭故事翰林居禁地以詞翰相高慷慨論朝政自璉始著有奏箋百餘卷及玉堂藏集

潘榮字尊用龍溪人正統戊辰進士景泰元年授吏科給



事中凡叅駁彈劾務存大體時言事者多觸諱詔禮部  
看詳犯者予罪榮抗疏言陛下初卽位首開言路此令  
下天下將謂朝廷以言爲諱上是之學士倪謙丁憂謀  
起復榮疏斥之謂經筵所以養聖德豈可使不祥之人  
侍左右聞者快之天順六年奉使封琉球復命擢本科  
都給事中成化六年三月偕同官上言近雨雪愆期災  
異迭見陛下降詔自責躬行祈禱宜上天感格而今乃  
風霾晝晦沴氣赤而復黑豈非應天之道有未盡歟夫  
人君敬天不在祈禱而已政令乖宜下民失所崇尚珍  
玩費用不經後宮不序恩澤不均爵賞濫施皆非敬天

漳州府志

卷之三十九

人物二

三

四百三十九

之道願陛下應天以實不以文庶災變可弭時萬貴妃  
專寵羣小夤緣進寶玩官賞冗濫故榮等懇言之是年  
陞南京大常寺少卿尋遷南京戶部右侍郎督糧儲復  
改南京都察院右副都御史仍總督糧儲兼理屯田事  
清剔宿弊得吏侵蝕米數萬斛蓄以備賑入爲戶部侍  
郎特命掌部事時追責兩浙鹽課積欠甚急無以償特  
奏豁之漕河淺糧艘遲延銜命往治運道異通陞南京  
戶部尙書乃乞骸歸卒于家贈太子少保賜葬祭榮爲  
人寬平和易不言人過而風規肅然遇事無所苟綱釐  
目舉家廟中朔望時祭必躬親曰我居官四十載事先



之禮多闕所自致者僅此耳鄉人以爲法

周宣字政舉龍溪人正統乙丑會試第三人授戶部主事時車駕北征芻糧繁浩期限甚急衆莫敢任宣奉命支放不日而事畢及爲潮州知府海寇黃于一等倡亂揭陽縣二十四村民蜂起從之宣督兵擒殺賊不敢出盜魁旣得宣謂其餘可撫而下也乃自詣賊營撫諭賊乞降因遍歷各村放回被擄男婦招撫良民千餘家已而山賊羅列等復聚黨爲亂劫惠州宣出不意搗其巢穴大破之時湯田黃寨等處皆從賊省臣欲乘勝盡殲之宣謂脅從罔治全活以數萬計賊旣平當道以宣漳人

漳州府志

卷之二十九

人物二

美

四百三十八

漳潮密邇請改調民泣留不能得乃群赴闕上疏乞留然新守已出京矣旣而海寇復大起攻圍縣治殺通判指揮潮士民白當道曰事亟矣必周太守復來乃定檄書到漳宣慨然治行入境大開城門納逃難諸良民出榜約日招降賊聞宣來如期駕船數百艘披甲執銳宣笑語之曰若願爲良民何爾爾於是咸投戈羅拜宣仍單騎詣賊巢遍歷二十四村且慰且諭復歸擄掠七百餘人海濱有叢祠賊諂神每事必卜賊旣約降屢不果宣遣人問之曰卜不吉宣曰第再卜之宣乃夜禱之神次日賊再往卜報曰吉然密使人覘之猶團結營寨如



故宣曰賊可滅矣欲降而猶豫衆不爲用矣一鼓盡殲之潮地平事聞詔錫賚并犒勞軍士陞山西行太僕寺卿賜三品俸丁母憂卒于家宣少雄于文行路潛思目不他矚遇意愜輒大笑不止人以爲狂其爲詩文多出新意自成一家言所著有易齋課若干卷

前志論曰謝璉潘榮皆從政材也明白英朝來北鄙治戎麓川違命陳善策葉宗畱鄧茂七輩羣相煽亂浙閩躡焉海疆岌岌急需良才周宣治戎禦寇功績丕著而論功詔爵處以太僕非其任矣是不能不爲鄺王曹張諸君子三歎息也

### 漳州府志

### 卷之二十九

人物二

三

三百八十五

魏富

夢吉

洪異

公諧

時蕃

蔡文

朱天球

吳善

盧岐嶷

穎頌

柯挺

王應麟

何楷

魏富字仲禮龍溪人成化丙戌進士授監察御史巡按廣

東時林蠻洞蜒爲患富下令廉得不法吏置于理蠻蜒皆向化復歸編戶遷浙江僉事陞副使縣令有健于擊斷而爲豪民所誣者直而釋之蕭山諸暨有石塘水啗其岸善崩募工伐鉅石脩築之嘉湖寧台薦饑富親往發粟以賑仍積粟以爲後備陞江西按察使繼擢右僉都御史巡撫順天畿內中貴人及將領守臣多操奸利



犯法亡匿互倚爲援富部分案捕旣得其人法必行一時無敢犯者疾作乞歸復起南京大理寺左少卿明慎庶獄正德改元陞刑部右侍郎是時年已七十三疏乞休給驛歸歷仕四十餘年隨事盡職未嘗立異取名而所至輒以譽終已貴傷親不逮養終身疏水自甘以其餘祿分卹宗族人以爲有平仲之風焉孫夢吉蔭入太學衡州府推官

洪異字大同龍溪人宏治乙卯舉人授通州學正分校應天擢知崇德縣嘗擒江淮劇盜除數十年之患開天長河數十里以通于江引水溉田萬餘頃擢監察御史執

漳州府志

卷之三十九

人物二

三

四百零九字

法敢言巡按粵東檄海道注鉞平海寇之亂嶺外以安陞四川僉事以母老乞終養服除起浙江僉事陞廣西僉議鎮靜自持不嚴而粟年七十乞歸里優游十有七年乃卒異爲人和而正家居未嘗以事干有司鄉里高之孫公諧嘉靖甲辰進士金華知府元孫時蕃萬歷丁未進士浙江僉事

蔡文字孚中龍溪人宋儒蔡汝作裔孫也嘉靖丁未進士授翰林庶吉士出爲兵部主事歷陞廣西叅議治柳州柳雜夷毗文以德化之多懷服土舍羅護強據羅城二堡侵民田數百畝當道不能制文曰是頑冥負固不可



長乃躬往蒞勘護率其露及晚立文不爲動宣恩威責之遂焚堡舍田而去未幾潮寇猖獗總督檄署蒼梧分守賊定轉府江副使時徃賊出沒道不通文大布威信令其酋領互相鈐束三載無叛者遷江西叅政治贛州以與征嶺北功賜銀幣遷浙江按察使河南右布政使尋轉貴州左布政使未至境會督撫調兵征水西僕人云師期尙遠可遲行文曰焉有是哉星夜馳之至官兵已敗文乃設方略撫戢之士酋已平陞本省巡撫貴故跨連滇蜀楚粵四省諸徃獷悍而都勻麻嚮大華三酋尤憑險跳踉乃督兵大征嚴令誓師不妄殺一人凡三

漳州府志

卷之二十九

人物二

三

四百三十四

奏捷會以母憂歸遂杜門不出年六十五卒于家文天性沈毅砥厲風節當浙臬時內臣李佑以督造至浙妄自尊以臨三司文抗不爲屈江陵柄政文恥以同年攀附尋常問寒溫而已家居其約著述自娛其遺稿有一得語聞見錄職方抄及集稿數十卷

朱天球字君玉漳浦人弱冠登嘉靖戊戌進士風節自持授南京工部主事滿考入京會楊忠愍論死西市天球招同志薛天華楊豫孫董傳策往哭之爲治其喪當日有四君子之稱歷南駕部及禮曹郎擢湖廣僉憲分守湖南丁艱服闋補粵東屯鹽僉事移督粵西學政陞浙



東分守叅議督學山東立四隅社學定諸講章及家禮  
易簡編頒布傳習所取文字黜浮崇雅于時東土斌斌  
得士稱盛擢南京太僕寺卿莊皇帝登極天球入賀值  
給諫石星言事忤旨廷杖因上疏乞廣容納宥狂直以  
隆聖政激切千餘言越明年外調拂衣歸治草舍于邑  
郊之南十餘載不入城市令房寰時候之傍舍以邑乘  
請天球乃集諸掌故裁定之朝廷念耆碩起天球副粵  
東臬旋內召南京太常寺少卿屢遷至工部左侍郎辛  
卯南掌院缺朝論以天球克持風裁陞南御史大夫俄  
遷南工部尚書癸巳畱主計吏與冢宰評騰僚屬互有

漳州府志

卷之二十九

人物二

罕

四百三十八

得失遂以直掛忌者口上疏乞歸再三乃得旨年八十  
三終于家贈太子少保賜葬如禮著有湛園存稿

吳善字元夫龍溪人嘉靖壬戌進士初授刑部主事恤刑  
廣東多所平反擢永寧兵備諸獍多反覆乃夷其巢洞  
列于編民建市廛通鹽法教樹藝於是獍人悉向化以  
軍功擢按察使再遷廣西左布政萬歷癸未擢應天府  
尹尋以副都御史巡撫廣西時府江徭叛平樂兵又告  
變所在焚掠議者謂宜姑緩撫之善曰養驕寇如養疽  
不治將深遂調集將吏躬入險阻斬馘以于計醜類悉  
平丙戌陞南京工部侍郎未幾以少司馬督兩廣軍務



恤兵寧民措置周詳已而邁疾海南黎徃叛力疾徃征  
遂以勞卒于官時傳署中有星光如斗上出半空而滅  
盧岐嶷字希稷長泰人七歲能文長博極群書督學江以  
達閱其李固杜喬論嘆曰吾當避此子一頭地嘉靖甲  
辰進士授歸安令節冗耗立三等法均差役聽斷精敏  
凡村落中有隱弊皆知之遷戶部主事旋改兵部郎整  
飭戎政條上平倭三策為讒者所中外謫久之起僉臬  
江西賊寇臨江岐嶷親糾兵搏戰斬數千級平之轉雲  
南叅議豸寇作亂殺憲臣及郡倖猖獗甚岐嶷提兵深  
入寇望風而靡乃縱反間開納叛人散牒數萬懸樹杪

漳州府志

卷之二十九

人物二

聖

四百五十一

令欵者執以為信于是賊黨殺其魁鳳繼祖以降以功  
超擢貴州按察使未幾又遭讒搆竟解官歸角巾私第  
課子談經為文宏博古雅自名吹劍集長子穎舉人季  
子碩萬歷壬辰進士司理南寧明慎多平反遷戶部主  
政

柯挺字以拔海澄人以貢入北雍萬歷癸酉舉順天第一  
庚辰成進士授南樂令戒徭役鋤豪強剔衙蠹庭無留  
獄盜不窺境迨入覲署事者讞盜七人皆誣服挺至察  
其寃密跡盜于清豐縣境得之七人者皆得白召拜陝  
西道御史上疏辨賢奸請逐都御史維尋從祭獻陵時



經營壽宮費帑金幾二百萬矣有上書請他移者挺周  
視良久曰是吉壤也所不如法者向耳詔詣壽陵面對  
咫尺帝座條答如響上喜賜食御史召對賜食非常典  
也歲丁亥大侵疏請發臨德二倉粟二十萬石賑之出  
按楚值鄖陽兵變馳入境誅倡禍三卒以狗變始定歲  
饑設粥賑民議給宗藩祿米有定則平亂賊劉汝國等  
楚人德之旋督留都學政所鑒別皆知名士丁內艱歸  
癸巳京察爲前議山陵與相左者齟齬之遂謫補外堅  
卧不出樂建安山水徜徉其間因家焉年七十四卒海  
內門人故吏生芻絮酒百舍重趂于霞山劍水間其感

漳州府志

卷之三十九

人物二

里

四百三十三

人如此

王應麟字仁卿海澄人少負笈從于潘鳴時潘家人夢青  
龍入室而應麟至異之以弟女字焉萬歷丙子登賢書  
庚辰成進士授溧陽令溧陽劇邑值有清田之役躬履  
阡陌稽其沃瘠高下以定賦惟均又增置社倉以備荒  
爲蜚語所中調南雄郡丞署郡篆有奸民潛結妖僧將  
爲亂尅期舉事應麟偵知先發制之逆黨悉就擒事聞  
詔賜白金聲譽復起壬辰擢潤州守歷遷四川叅政再  
擢右方伯時三殿需材奉勅採木蜀中應麟念蜀游罹  
兵革民困已甚難堪巨役乃募木于荆商官給其直躬



臨涪渝以督之終事而民不知辛亥擢江西方伯道經江寧值巨漲皇木漂流楚人刮去蜀中題識員爲楚材運官禁之不能止應麟乃停舟江潯多方曉諭運官得以木輸上方癸丑拜京尹勲戚巨璫不敢干以私已復巡撫南畿百姓聞其來皆相慶秩滿乞歸疏十三上然後得請時天下多故應麟雖還里關心國事而神宗光宗憂詔相繼至力疾哭臨病發不可支卒年七十有六贈都察院右都御史予祭葬

何楷字元子漳浦鎮海衛人生有異質書過目不忘天啓五年登進士時魏璫肆毒朝紳楷不謂選而歸崇正時

### 漳州府志

### 卷之三十九

人物二

聖

四百二十九

起戶部主事權濟墅關事竣進員外郎七年詔簡部曹爲言官大臣多推楷改刑科給事中流寇陷鳳陽燬皇陵楷疏劾撫臣楊一鵬按臣吳振纓下獄語侵輔臣溫體仁王應熊旋復劾兩人朋比行私振纓爲體仁私人一鵬爲應熊座主情面重則祖宗之陵寢爲輕朋比濃則天下之刺譏不恤語甚切至忤旨鐫一級復疏請罷內揀上又不從是時上憤在廷之臣多貪庸顧身家視君國輒泄泄思欲痛整齊之於是詔獄繁多司寇諸曹郎日不暇給有言者上疑爲偏護舉朝皆結舌無敢言楷乃疏陳慎刑八議娓娓千言援祖制明國典寄匡救



于將順之中天子知其諷切也一時獄稍寬楷白以身  
爲言官不得默朝廷每有大事時政有得失嘗侃侃敷  
陳議保舉言擇相請停秋決及言海寇宜勦併駁諸大  
臣情弊卽皇陵一案楷已得罪尤復再申前說謂二輔  
輕視祖宗勇護私黨政本何地相率爲比尤而效之弊  
將何極及應熊陳辨楷復駁其明旨未下應熊何知置  
辨必有往來偵探漏洩禁中語者應熊竟由此罷去蓋  
天子亦知其敢言雖不能悉從然顧心志之屢遷工科  
都給事中時火星逆行天子減膳修省兵部尚書楊嗣  
昌方主款因歷引前史眩惑帝意楷疏駁其立言本心

漳州府志

卷之二十九

人物二

四

四百三十七

附會罔上及嗣昌奪情柄政楷又疏劾其忘親與黃石  
齋劉晉卿趙景之林自芳先後糾參長安謂之奪情五  
諫云再鐫二級調南京國子監丞旋丁內艱乃歸復講  
學于紫芝書院服闋諸大臣請復原官不聽旣而國用  
匱乏朝廷思用鈔乃名楷問鈔法至南都而京城已陷  
矣會福王在江南擢戶部右侍郎兼工部管錢法馬阮  
爲政國事日非屢疏乞休不報南都陷乃間闕至閩  
中擁立唐王起楷戶部尙書旋改都察院左都御史與  
鄭芝龍不愜請告再三王欲兩全之暫令回籍歸至中  
途遇盜截其一耳蓋芝龍使其將楊耿爲之也後漳州



不守抑鬱以卒楷博綜群書寒暑不輟尤邃于經學所  
輯周易訂詁詩經世本最號精博春秋釋尚少四公然  
皆為學者所傳云

前志論曰宣正以後歷嘉隆臨漳人才輩出入為卿  
貳出為監司類能因時濟變隨事立功具經濟之選  
蔡文之不附江陵朱天球之慟哭忠愍君子尤躋之  
竹箭有筠松栢有心舉世溷濁貞士乃見非獨以才  
也故以元子並殿諸君子之後欲使世知所以全其  
才而遭時變徒以經濟名者愧矣

張寬表楊釜瑛陳宏遷沈源

漳州府志

卷之三九

人物二

聖

三百三十五

林梅唐堯欽蔡時鼎吳顯宋溫如璋

林鈺馬鳴起盧化鰲邱懋煒繼階士錚

士鏞楊聯芳履園戴仕衡林秉漢

劉其忠盧經魏呈潤涂中吉鄭國欽

張寬字周宏南靖人景泰辛未進士為御史直言敢諫天  
順元年以劾總兵官石亨忤旨下獄值天變得釋出知  
安定縣禦寇有功卒于官寬力學好義領鄉薦後嘗捐  
穀三百石作南山陂千餘丈又割地為圳萬餘丈以興  
水利鄉人至今德之子表舉人臨安知縣

楊釜字受調長泰人父垓字復一富而能施歲連歉頻捐



穀施粥不厭全活甚衆金志行耿介登景泰甲戌進士授御史巡按山東浙右糾察嚴厲權幸無所避按浙時闕尹擾民民苦之闕私藏違制龍鳳匹段及銅鶴等物金按得其實遂劾之又有時宰橫暴莫敢指陳金復廷劾之直聲大振以母憂歸里宦橐蕭然卒之日東魯浙右聞之皆泣下

陳宏字丕道龍溪人

今海澄

天順甲申進士拜監察御史視

兩浙鹽課及按淮陽諸郡揚清激濁風裁凜然成化間彗見詔求直言宏與御史林誠等交言商輅當康定朝不能保護儲位不宜復當國願罷輅以謝天譴及論都

漳州府志

卷之二十九

人物二

哭

四百五

御史程信剛復尚書姚夔黷貨士論壯之遷湖廣按察司僉事沅江有豪民與人爭貨產聚黨持兵器鼓噪宏按法誅之又討巨賊封敬中于洞庭以功超陞副使丁母憂卒于家宏剛直敢言遇事詳練權貴憚之方擬大用而年不竟志識者恨焉孫遷監察御史

沈源字澄之天順甲申進士董脩英宗實錄成拜南京監察御史守正不阿巡視上江法嚴令肅奸盜遠颺考績入都值天變疏請修德弭災十事論薦編修章懋給事中王徽不宜以直言被謫乞召還廷議韞之吏部郎中陳雲所爲多不法復疏劾之直聲震輦下成化六年命



閱視團操時留都諸勳貴怙寵恣橫源一繩以法勳貴不能堪共出力排之謫盧氏令臺省交章論救弗能得一時正人如少卿劉瑄翰林彭時等于其行咸爲詩歌餞之名益高至縣興學校均徭役清獄訟政化大行朝野方望內召獲伸其志竟以病卒於官百姓謳思不置建祠以祀源博綜群籍著有疏稿吟稿藏於家爲御史嘗哦杜甫哀職曾無一字補之句其風節可概見矣

林梅字以和漳浦人嘉靖八年進士歷戶部郎中督課江州覺察內帑僭運糧儲所至持正不撓坐忤權貴出知泰安州歷慶遠南安二府同知陞南京禮部郎中卒于

### 漳州府志

### 卷之二十九

人物二

七

四百三十二

官爲人慷慨多直節人爭重之

唐堯欽字寅可長泰人隆慶辛未進士授中書舍人選工科給事中觸時感事多所建白轉兵科左給事中旋遷刑科都給事中有錦衣鄭承憲乞父鄭福葬地福皇貴妃祖也上給與墳價五千兩堯欽上疏力言祖宗成憲妃祖無與葬之例祖旣如此父當何如妃祖如此后祖謂何將來紛紛陳乞豈有底止上不從然貴戚肅然憚之司禮監張鯨怙權黷貨事發上罪諸黨附者念鯨侍奉年久姑准供事堯欽抗疏謂黨附之罪皆鯨罪也羣奸伏辜而獨庇首惡法紀安在且中外藉藉不聞公道



而聞厚賄陛下以賄罪鯨復以賄用之乎時與同官李沂疏同上上大怒明日旨下杖沂六十堯欽姑免究旋陞太僕寺少卿條陳馬政鑿鑿可行遷南京太僕寺卿以人言拂衣歸居家儉約性孝友分產給諸子弟卒賜祭葬所著有崖略篇

蔡時鼎字台甫漳浦人萬歷甲戌進士歷知桐鄉元城二縣兩邑刁醇異俗時鼎一以勤慎廉約勸學爲質吏民悅而安之旋擢雲南道御史首劾太和山提督內監田玉不宜兼分守及不法狀貂璫憚之差視准鹽疏列惠商裕課十事次第舉行鹽差向有例金却不受命吏積

### 漳州府志

### 卷之二十九

人物二

哭

四百二十七

之以爲濬河之費及置各屬邑學田以濟貧士差竣回值順天主試者中飛語引繩批根時鼎抗疏以事初糾發不由外廷徑從中出宵人流言直達御前漸不可長忤旨謫馬邑典史久之乃起官太平司理歷轉南京刑部主事復疏陳首輔申時行貌退讓而心貪競外包容而中伎刻私僞萌生欲蓋彌著昔張居正之禍在徇私滅公然其持法任事猶有補于國今也改革其美而紹述其私盡去其維天下之心而益巧其欺天下之術徒思邀福一身不顧國禍若而人者尙可俾相天下哉懇款萬餘言不報尋進郎中卒於官邸年方四十三囊懸



如洗畱都士大夫捐資爲歛時鼎骯髒磊砢疾惡至嚴  
尤精於摘伏發奸吏不能欺而直道如矢年不及中壽  
衆皆惜之

吳顯字景猷漳浦人萬歷甲戌進士初知六安州時高郵  
寶應河堤壩總河擇守而難其人特疏以顯請詔從之  
抵任拮据脩越河築老堤植柳護之三堤屹然江陵相  
方厲驛禁其太夫人道過州治役驛夫至八百餘人顯  
力裁相家奴据署詎諄誘顯登舟出數婢子奪其州印  
去顯曰州太守奉汝家相君法何絮也直指監州聞之  
頓足歎曰大不諳事急馳解得罷然江陵不罪也遷比

### 漳州府志

### 卷之二十九

人物二

吳

四百零八字

部員外郎陞江西僉事歷廣東副使所至有伉直聲道  
不諧俗竟左遷以疾乞歸顯端方耿介恥隨流俗而愛  
人下士忘其貴顯士紳多慕之子宥萬歷乙未進士山  
東道御史

溫如璋字孚德海澄人萬歷己丑進士初授貴溪令有治  
聲丁艱歸服闋補霍邱令甫下車境內盜橫行捕其魁  
殲之歲大疫施藥予方所活甚夥招返逃亡六百餘家  
俾復舊業擢廣西道御史直言無忌多所匡濟出視兩  
浙鹺政釐清宿弊海寧陳某倚恃其父威力噬螫鄉曲  
如璋逮治之其黨援多方營救不能脫嗣按東土復疏



彈稅監馬堂暴橫所部璫爲氣縮竣事請假還里起奉命按三吳行有期矣病瘍卒衆皆惜其用之不究云

林鈺字實甫龍溪人萬歷丙辰進上殿試第三人除翰林院編修歷官國子司業署監事監有銅鼎銅缸爲臨雍會食及貯水備火之器逆璫方熾欲假鑄錢鈺不與旣而諸生陸萬齡傳璫意欲就太學中建祠祀璫及其父鈺持不可萬齡就手中奪啓事以去明日有旨責鈺閒往鈺翩然就道崇正改元復原官累陞侍郎兼侍讀學士九年以枚卜召對陳用人理財靖寇寧邊四策卽日拜東閣大學士入閣辦事時上方疾黨人以鈺誠慤不

### 漳州府志

### 卷之二十九

人物二

五

四百二十八

立門戶特加眷顧首輔忌之困以事遂得疾而終鈺爲人冲淡和平廉介自守鄭芝龍受撫奉千金爲壽鈺却之復書曰成人之美君子也因之爲利非君子也芝龍亦歎服其量卒諡文穆

馬鳴起字伯龍龍溪人爲人類椎厚長者然遇事抗直敢言萬歷庚戌登進士授浮梁令多政聲調新建復內召爲湖廣道御史熹宗立保母客氏比魏璫權傾中外一日以公論出宮復取之入旨甚悲募廷臣上疏輒被呵譴鳴起乃抗言祖宗家法親王長卽就封太子冊立卽居東宮家人之間最爲嚴肅今客氏一保姆長居禁地



壞家法不便一宸居邃密慎闕防永巷之人恣意出入不便二且女德難終婦愛不極履霜堅冰可虞不便三又有權璫操其線索涓涓不已將成江河不便四出入非時外廷必爭爭必激激必逐以保姆逐言官累聖德不便五事關國體責在輔臣不便六疏入璫摘線索語激怒上杖一百時葉福唐相國猶在閣力爭之得不死初上以鳴起樸忠嘗使視屯馬事竣復命督學北畿皆踵左光斗故與光斗相得甚歡而趙南星爲太宰鳴起布其文於學宮會南星爲群小所怒而光斗以攻璫得罪鳴起亦旋罷職歸時璫焰焚灼海內名賢羅織幾盡

# 漳州府志

## 卷之二十九

人物二

至

四百二十

周起元被逮鳴起所議三案事犯衆忌緹騎且旦暮出鳴起寢食如常謂所親曰卽不測命耳無負諸君子居無何懷宗卽位諸黨殛去乃起鳴起大理寺丞隨擢左通政乞休不允改南大常尋陞總督江南七省糧儲兼理軍務戶部右侍郎左僉都御史又晉右都御史掌南都院事鳴起聞賊陷和州乃兼程歸與諸卿議防守機宜又聯保甲勸富戶積穀請諸宗室助臣蠲助諸事畢備畱都晏然部推冢宰未幾卒上聞之予葬祭贈太子太保諡忠簡

盧化鰲字爾騰漳浦人萬歷丙辰進士歷蘭谿婺源旌德



三邑令以巡撫周起元薦陞戶部主事尋改吏部文震孟揖之曰朝中素耳勁節今銓政賴公主持魏璫聞而忌之值楊璉左光斗之獄併誣化鰲遂與璉等二十七人同日下獄削籍歸崇正初錄用東林諸君子起化鰲原官以清慎轉郎中因病乞休已去官道路有警留京師感時事因極論古今得失興亡之故君子小人陰陽消長之機著易傳藏于家

邱懋煒字以鄂漳浦人萬歷甲辰進士授行人奉使冊封代藩賜金幣一無所受擢兵垣上屯田馬政及備倭八議復疏言東林諸賢恬志息機潛脩道德何嘗自爲標

### 漳州府志

### 卷之二九

人物二

五

四百三

榜今愛東林者聞一言不爲東林便斥爲小人之黨疑東林者聞一言稍爲東林遂加以依附之名如中有物執而不化孰若各捐成心共偕大道以保全善類乎時神廟享國日久羣闖多媒孽東宮乃復上疏乞罷東廠又疏陳鄭國泰十罪請斬之以謝天下由是直聲振朝端先是代庶子爭立懋煒援隱桓大義責之爭賴以息未幾丁外艱歸起補少叅分守惠州與制府許宏綱不合拂袂歸再補虔州有守虔八議虔歲有常例金八百應入于官悉捐之以供宗室無祿者秩滿晉粵東臬副遂致仕嘗倡築杜濤堡砌石路置義塚鄉人立生祠以



報焉子維階善承親志居喪哀禮以孝聞孫士錚學行推重州里士鑪由舉人任浮山縣令有仕蹟

楊聯芳字蘅苑龍溪人萬歷辛丑成進士授行人出知杭州正直不避權貴有大僚子弟驕橫犯法聯芳庭笞豪右皆斂手遷黔憲為思者所中遂致仕聯芳雖抗直顧真率坦易卽販夫童子相對笑語無貴容曰吾居鄉故也惟閭閻有不便者陳于當道每侃侃剛氣露眉宇當道亦以齒德嚴憚之年八十七卒著有諸經纂註三十四卷子履園字萊民世為明勲裔生而倜儻丙戌後隱居不就試有夙慧讀書日萬言為文奇警類長吉

漳州府志

卷之二十九

人物二

三

四百二十六

戴仕衡字章尹長泰人遷於興化萬歷己丑進士以令新建治行第一入為吏科給事中年弱冠正直敢言時上方以靜攝為高仕衡上言元首股肱宜一體相通不當隔絕日本乞封朝廷將許之仕衡復抗疏極論其不可因劾尚書石星欺罔不忠及輔臣趙志臯稊稜不決繼復以屯田習戰足食足兵為言凡所陳論數十事悉中時弊惜朝廷不能用也竟齋志以卒

林秉漢字伯昭長泰人萬歷乙未成進士選庶常轉浙江道御史所建白皆切中時務出按粵東值中使採珠船出沒海中莫敢誰何復引交寇闖入內地秉漢首疏



停採欵列七宜罷以消變未萌言甚剴切時權使李鳳  
橫尤甚秉漢臚列罪狀特疏糾叅虐欲稍戢嗣以議楚  
藩事忤旨謫黔臬從事遂從容引去秉漢剛直不阿未  
嘗以搏擊邀名然所陳奏皆持大體如疏陳大臣引疾  
謂宜決去留以養廉恥九塞需餉請亟振虛弱以壯兵  
威宗室繁多請亟從四民之業恩而閑之以法義乃以  
成其仁皆救時碩論也既歸築浩然亭讀書以終天啓  
間上閱諫疏嘉其忠懇贈太僕卿所著有若決草長山  
集行于世

劉其忠字長瑄長泰人萬歷丙辰進士以潮州司李擢河

漳州府志

卷之二十九

人物二

五十四

四十五

南道御史具疏陳邊圉事甚悉時魏忠賢秉權楊璉疏  
忠賢二十四大罪疏久不下其忠繼疏云忠賢憑藉寵  
靈簒弄威福使中外聞者無不知天子左右有忠賢一  
人臣恐其欲飽而驕威過而毒勢窮慮極欲終為善不  
負皇上不可得也從來宦寺欺蔽人主以其密邇意旨  
易窺及其太阿在手九閭之上有見不盡見聞不盡聞  
者矣今忠賢罪狀已昭大小臣工交章已滿皇上為國  
家計宜卽付忠賢法司明正典刑以慰列祖之靈以塞  
天下之議璉恨甚思中之會其忠出按甘肅邊徼騷動  
璉以為投荒當自斃怒稍殺踰年竟削籍歸崇正改元



起原官未幾丁外艱卒于家黃道周爲之贊曰熙朝之  
慝三發闔豎以宗祏靈雖熾亦替魏璫始煽尚于直瑾  
九錫將加震出乃殄諸賢伐鼓則邁陳實雖蹈水火亦  
克有救吾鄉之哲有周仲先長瑄嶽嶽幾以禍駢近關  
之出自投遠塞及覩日月用慰親在谷木淵冰視彼宛  
鳩長松早凋亦垂千秋

盧經字橋權長泰人四歲能屬對十八補弟子員天啓釋  
褐爲行人擢御史所陳奏皆持大體不爲危言激論及  
巡按河南鋤豪去奸貴戚宗藩皆斂手以避時萊陽郡  
王允橫暴強占許州諸生莊田無敢問者經至卽按其  
漳州府志

卷之三十九

人物二

五十五

四百零九

事夜草疏燈忽自滅左右毛竦經奮筆自若極數郡王  
之罪王訴於懷宗怒逮經欲寘之死侍郎陳子壯禮科  
蔣觀國力救之乃繫獄二年遣戍及歸率二弟偕隱不  
出

魏呈潤字倩石龍溪人崇正戊辰進士選庶吉士改兵科  
給事中三年冬疏陳兵屯之策請勅順天保定兩巡撫  
分營訓練而練兵之外兼營屯田又陳閩海勦撫機宜  
六事並議行明年夏久旱疏言驛站所裁纔六十萬未  
足當軍餉十一而郵傳益疲勢必再編里甲是猶剗肉  
醫瘡瘡未瘳而肉先潰關外舊兵十八萬額餉七百餘



萬今兵止十萬七千合薊門援卒非溢原數如派五百九十萬外新增又百四十餘萬猶憂不足何可不爲稽核邊報日急非臣子言功之日而小捷頻聞躐加峻秩門客廝養詭名戎籍不階而升悉糜俸料臣懼其難繼也江淮旱災五湖之間海岸爲谷舊穀不登新絲未熟上供機織宜且漸停銓法壞于事例正塗日壅不可不疏通撫按捐貲助餉大抵索之民間顧奉急公之褒上蒙而下削不可不禁飭前後所上疏剴切深摯皆此類也數被沮抑氣愈厲曰朝廷設臺省于左右所以斥奸邪輔君德也此輩不去君德何裨省中目之爲魏長孺

漳州府志

卷之二十九

人物二

五十六

四百三十八

竟以直言降補所著有館課疏草南陔草負土編

涂仲吉字德光鎮海涂一揆季子生而骯髒喜談節義時論未之許也稍長入太學聞時事闕失輒頓足或時爲流涕一日在金陵聞黃道周下詔獄時方飲投觴而起曰仲吉當一行爲朝廷保正士其友人謂之曰君有拯溺之志不度布衣之力將自致于九死之罪願君更思之仲吉歎曰黃公天下之正人也主上又英明天子也黃公見殺則天下之正人去主上殺黃公則朝廷負殺直臣名事無大于此者因舉酒曰今日爲君盡觴明日入京師諫不聽卽藁葬長安門外耳遂間關赴闕上書



通政使施邦曜歎之曰生有取義之勇不度主上之怒將目致于不測之淵蓋甚爲生危之仲吉作色曰朝廷柰何使僕蠕者作納言乎邦曜愕然謝曰生年少見義敢爲老夫耄矣當爲君一獲罪疏上仲吉盛陳道周學行敦摯其言雖過戇其意實忠純因引唐宗漢武待魏徵汲黯故事謂主上方欲遠法堯舜柰何知出漢唐庸主下且謂三季之主墜小人之術使賢人君子受黨人之禍以此摧士氣失人心今不宜復以黨人輕殺學行才品之臣上覽疏大怒杖仲吉於長安門外復下錦衣獄鞫指使者錦衣喬可用盛陳刑具仲吉曰吾閩南男

### 漳州府志

### 卷之二 九

人物二

五

四百二十六

子見義而動死則死耳寧足怖耶可用拶其指盡折仲吉不少挫旣而懷宗亦稍悟乃與道周俱論戍未幾復赦還福王在南都給事中陳子龍薦可任不報閩中擁立唐王方震孺復薦仲吉自代授御史唐王亡仲吉不食十餘日嘔血死

鄭國欽南靖人庠生萬歷季年稅璫高案遣其黨邱九成來漳凡關津皆有權酷虐苛刻衆皆側目霸和溪船占稅至裸涉水者亦勒索錢乃得行國欽義奮率子弟鄉人誦逐出境九成怒走入省將訴之宋衆惶懼國欽曰汝曹速逃有禍吾獨身當之適高案被旨撤回禍竟寢



國欽氣骨岸然生平作事慷慨尙氣節類如此  
前志論曰漳自宋來黃預忤蔡京劉衍折安石高登  
斤秦檜余嘉論侂冑光前史焉明自太祖以名節振  
厲士大夫厥後或權臣專柄或闕寺弄權漳諸君子  
奮忠讜觸機穿批鱗履尾踵相接至以抗直忤上官  
者難更僕數也山有猛獸藜藿爲之不採雖然北門  
之簿錦衣之獄赫赫乎凜凜乎視前史禍更烈矣

漳州府志

卷之二十九

人物二

五

一頁六

漳州府志卷之二十九終